



Tir Yimyim

www.tirymyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tirymyim@gmail.com

TAPAK 8

Yangia anidakangma :



Tir Yimyim



tir_yimyim



tir yimyim

TAPAK 7



Suryakumar-i pa indang Asia Cup match fees tenla agütsütsü

Ni linük yutsür jena maotsü, maneni nokdaksü: KP Sharma Oli



VOL. XXII ISSUE NO. 347 (ADOK 347) DIMAPUR SANGTENNÜ (TUESDAY) RONGJUI (SEPTEMBER) 30, 2025 ₹ 5.00

CANSSSEA-i maneni lungkak aittsü

Dimapur, September 29, 2025 (TYO): September 25, 2025 Non-SCS officer tem IAS nung anioktsü atema Screening Committee senden menogo aser iba ya sorkar nem shidi balala züluba anema lir anungji mepelaba sayua lungkak aitba shilem tanabuba tenzüksü ta Media Cell, Core Committee & Action Committee-i metetdaksüogo.

Iba Committee ya CANSSEA, FONSESA, NF&ASA, NSSA aser NIDA külem ser tentetba lir.

Iba shilem nung State Headquarter Kohima nung sorkar office tem aser public tesemtem nung Poster Campaigns agitsü.

March 10, 2025 nü Vacancy Circular nung aliba ama mesüi Screening Committee IAS selection atema Select List sangoktsüba khukhua aitsür aser

iba ta khenyongi magizüker ta parnoki ashi.

March 10, 2025 nü Vacancy Circular meyipa agiba aser yanglushiba sülen sorkar dangi shidi aiben zülüogo kechiyong iba sangdong nung NPSC ajanga meshimokba ketdangsürtem IAS nung anioktsü atema lenmang lapoktsü ta Core Committee & Action Committee-i ashi.

Select List meyipa magira aser March 10, 2025 Vacancy Circular tanaben magütsüshi tashi onoki iba poster campaign agiba sülen ano ozüingi melaba lungkak aitba sentongtem agiyonga aotsü. IAS nung aniokba nung political meinprong kecha melii temsüa alirtem anioktsüla ta Confederation of All Nagaland State Services Employees Association (CANSSEA)-i metetdaksüogo.

NPF-i Zunheboto Reconciliation Meet atema tenüngsang agütsür

Dimapur, September 29, 2025 (TYO): September 27, 2025 nü Zunheboto otsüsütsü aketba Reconciliation Meet takok ngua ayonga agiba atema Forum for Naga Reconciliation (FNR), Sümi Hoho, kin hoho tem, civil society organizations, arogo lennirtem aser Naga Political Groups (NPGs) nem tenüngsang agütsür ta Naga People's Front (NPF)-i metetdaksüogo.

Zunheboto Resolution ajanga Naga nunger yimjung aser telongjem lenmang nung tongtipang mera ka agir. Tatok agütsüteptsü, tsükchitep anentsü aser Naga Machang ka atema külemi inyaktsü tasü itta aser tebilemtsü bena nangzükba atema tenüngsang agütsür ta Press Bureau, NPF Central HQ : Kohima sangdong ka nung ashi.

NPF-isa October ita piyong sarasademtsü aser meyipa reprangshitsüba den tanüla tsütsü tayongzükba pelashishia

agizüker. Meimchirtem mulungjang nungi ang chichiba putepshiba adoker aser iba tanüla ranglok ajanga Naga nunger len anitsü ta metetdaksü.

India sorkari tawa küm pungu atema NSCN-K maneni noktangogo aser mangatettep ajak olemtep ajanga angatetteptsü amanger. India sorkar dang yimjung maparen nung madenba Naga political groups ajak den jembitsü aser Naga yimten latettsü ayongzüker ta NPF-isa metetdaksü.

Yimjung aser olemtep tenangzükba nung tentetba regional political party ka ama Naga nunger longjemtsü aser külem tarutsü atema inyakba mapa ajak pusema nungiter ta NPF-isa ashi.

Kin, telok aser political group ajaki Ungma aser Zunheboto Resolutions tangatetba maneni pusema nungittsü ayongzüker ta NPF-isa ashi.

Arishir Sosangtemba küm 108 nung taküm tembang



Sosangtemba

Mokokchung, September 29, 2025 (TYO): WW2 war veteran aser arishir Sosangtemba alima nungi pilaa ogo. Pa arishi küm 108 liasü.

Pa September 27, 2025 nü Lenjem Hospital, Mokokchung nung arishi tembang aser September 28 nü Longsa yimdak pa den asüpila sentep sentong agia mang remogo.

Arishir Sosangtemba Longkumer ya Longsa yimdak tambutisang liasü aser shibai metet Aor rongnung-a tambusang sür alitsü südi ta bilemer,

Pa ya Longsa nunger rongnung business inyaker nung mezünpur rongnung ka liasü aser pai Sema aser Sangtam oshitem kanga junga jembitet.

Yimden koda masüdag aser kishikinartem den ken o jembidang pa aliba agi ken o aika nung kümzüka aruba otsü lir. Talisa Riongsanger puso mapang pai sho ali aser - sarong (Suromi) den küm aika anki shibanger lia par mapang lapokdang lenmang tom nung yimsüsür ajak tenüng nung pai mezüng ajurutepa salema agizük.

Iba ama küm aika Anki shibanger ajurutepdang mezüng ajuruteperji tepu mainera ar mashir ta tazüka aruba tensa nung mezüng ajurutepnür arentaka liasü.

Deputy CM Zeliang-i NH-29 anenoka aidak semdang; bypass yanglutsü

Kohima, September 29, 2025 (TYO): Nagaland Deputy Chief Minister T.R. Zeliang-i Hombarnü National Highway-29 nung ali anenoka aiba tesemtem semdangogo.

T.R. Zeliang-i Kohima district kübok Dzudza village nung Liezocha 'C' Khel aser Kezanu, Jotsoma village (old KMC dumping site) semdanga liasü.

Tzünglu kanga aruba ajanga hopta ana tashi state yimtiba asoshi tongtipangtiba highway anenoka ayir. Tang tashi nung 300 metres shi ka anenoka iogo aser iba ajanga garitem mesenzüteter.

Deputy CM Zeliang-i PWD (National Highways) bena lir aser pai ashiba agi sorkari emergency maparen atema Rs 4 crore lemozütsüogo.

Iba nung lenmang 250-metre portion paitoktsüba dena lir aser Centre sorkaria Rs 2 crore talila agütsüsemogo ta Zeliang-i ashi.

SLA approval sülen lenmang

temalen 50 metres aser teküpoklen 250 metres ali alizüktsü mapa inyakdar ta paisa ashi.

Ministry of Road Transport and Highways (MoRTH)-i Jotsoma Junction nungi Lerie tashi 12.6 km blacktopping asütsü atema Rs 19 crore mulunga agizükogo. Maneni Liezocha nung lenmang raksaba atema senotsü talila meshisemtsü ta Deputy CM-isa ashi.

Bypass lenmang ana-Niuland nungi 10th Mile tashi 37-km Kohima Capital Bypass ya 2016 nung senotsü agütsü saka ali tebilemtsütem ajuruba agi menu saka iba lenmang tang yangludar. Ano, Peducha nungi 10th Mile tashi anentsüh maludak lenmang yanglutsü ta paisa metetdaksü.

State sorkari MoRTH dang item bypass lenmangtem ya National Highways ama sangdongtsü ayongzükogo ta paisa shisem.

"Tang ajuruba khuret ya meimchir aibelen ajanga masü saka alima tatalokba ajanga lir aser iba jagi bypass yangluba ajanga dang khuret koktettsü. Tang aliba lenmang atema contract agreements yakta sign süteptsü aser ita 18 tsüngda yangluzüktsü atema mapang agütsütsü. Iba contractor-isa road maintenance tebilemtsü abentsü" ta Deputy CM Zeliang-i ashi.

Kisama Heritage Village lenmang atema soil tests ajanga iba tenem ajunga anenoka ayur anungji protective measures meinyaktettsü ta osang nguogo. NHIDCL dangi bypass proposal ka yokogo aser ibaji Ministry-i shisadangdar ta TR Zeliang-isa metetdaksü.

"Asenok kanga timtemogo ta ni shiogo. Tarutsü nung senzusenbongertemi ibala khuret majurutsü atema onoki India sorkar dang bypass roads atema senotsü meshitsü" ta paisa ashi.

Congress-i NPF-NDPP loktepba metsübur; Public rally ayonger

Kohima, September 29, 2025 (TYO): NPF aser NDPP ka küma loktepaka kecha balaka masütsü ta Lok Sabha MP aser Nagaland Congress president S. Supongmeren Jamir-i ashi.

"Iba ya regional party tem ka akümba dang lir aser iba ajanga temelenshi kecha balala malitsü" ta Supongmeren-i ashi.

Hombarnü osangbener den senden ka amendang MP Supongmeren-i iba ya ashi. Iba osangbener senden nung NPCC-i October 7 nü Naga Solidarity Park, Kohima nung public sentong tulu ka ayonga agitsü aliba osang lemsatep.

Iba sentong nung Congress president aser Rajya Sabha nung

Leader of the Opposition Mallikarjun Kharge den AICC general secretary K.C. Venugopal aser AICC secretary in-charge of Nagaland Saptagiri Sankar Ulaka nungeria o jembitsü.

Iba rally ya omen asem-"save democracy, save secularism, & save Nagaland" nung ajemdaker alitsü aser iba mapang lanur nem mapa agütsütsü, entrepreneurship, sorkar ketdangsübaren tajung agütsütsü aser connectivity tajungba akümtsü indang onüktem jembitsü ta NPCC President-isa ashi.

Public sentong agiba sülen Political Affairs Committee, District Congress presidents,

aser tanga tongti lennirtem den 2028 elections atema Nagaland aser Northeast region nung Congress indang asalentong lemsateptsü ta paisa ashi.

Iba sentong nung nisung 10,000 tema adentsü aser iba ya election nung tashi akümtsü atema merangtsü ta Supongmeren-isa ashi.

Tanga political party temia iba rally nung adentsü akok kechiyong democracy aser secularism kümzüka ayutsba ya külem tebilemtsü lir ta paisa metetdaksü.

Iba senden nung NPCC general secretary Yona Konyak aser secretary Akuonuo Miachieo na aden.

DoSE-i Graduate Teachers tasentem arangshi

Kohima, September 29, 2025 (TYO): Directorate of School Education (DoSE), Nagaland-i September 24 aser 25 anogotem tawa tasen shimokba Graduate Teachers (Maths/Science) atema In-House Orientation agiogo.

Iba sentong nung Science Graduate Teachers 73, Maths Graduate Teachers 51 aser Post Graduate Teachers 5 aden.

Iba orientation nung Andreas (Deputy Secretary to the Govt. of Nagaland)-i Introduction to Nagaland Government Servants

Conduct Rules 1968 aser Raymond Vizo (SA, GoN)-i Nagaland Education Service Rules 2017, Maintenance of Service Books/APAR sayu.

Maneni, tesayur tasemtem dang SCTE ajanga Teaching Methodology of Science in Classroom, NECTAR Team ajanga SMILE App & TAMS, Dream A Dream ajanga social-emotional learning/inclusive education, SCERT ajanga RTE Act 2009/NEP 2020 aser Accounts Section DoSE ajanga basic accounts matters/pay

fixation indang tesayubatem agütsü.

Mongintemi aniba sessions aser interactive discussions ajanga tesayurtem tajungba akümtsü.

Keynote address was delivered by Tinumayang, Additional Director and Deenabandhu Panda, Additional Director.

Iba sentong nung Principal Director DoSE Shashank Pratap Singh (IAS)-i tajungshi o jemi aser Additional Director Tinumayang-i okila jembia liasü.

NCS (P) 2024 Batch pur Bharat Darshan Tour temogo



Nagaland Civil Service 2024 Batch probationers tem Bharat Darshan tour mapang September 26, 2025 nü SIPARD, Tripura nung tangokba noksa ka yangi angur.

Dimapur, Rongjui/Sept. 29 (TYO): Bharat Darshan sentong nung shilem ka ama Nagaland Civil Service (Probationers) 2024 Batch tem September 8 nungi 26, 2025 tashi state asem semdanga Kerala, West Bengal aser Tripura ayimjema liasü.

Tarutsü nung sorkar ketdangsür mapa inyaksüpur nem yimsüsüba yimya, inyakyim balala aser India indang sobaliba atajungba nung angatetdaksütsü nükjiding nung iba sentong ya ayongzüka liasü.

Kerala (Sept. 8-14) nung parnok ya Institute of Management in Government (IMG) nung amung. Yangji Kudumbashree women

empowerment initiative, good governance practices aser tourism development indang session tem agia liasü.

NSC (probationers) temi Kerala Arts and Craft Village, Startup Mission, CTCRI, aser Alappuzha Houseboat project semdang aser Amritapuri nung humanitarian leader Mata Amritanandamayi den sensaksema liasü.

Netaji Subhas Administrative Training Institute (NSATI), West Bengal (Sept 14-20) nung sustainable urban management, e-office practices aser administration yimya nung rangloka liasü.

Iba mapang parnoki New Town Kolkata Development Authority, Smart City, Eco Park, Indian Museum, aser

Swami Vivekananda indang ki semdanga liasü. Parnoki Barasat II block nung field trip aoba ajanga sorkar schemes balala mapa kuma inyakba tetongzüng nung oa angateta liasü.

Tripura (Sept 20-26) nung State Institute of Public Administration and Rural Development (SIPARD) ajanga rural development, welfare schemes, smart city projects, aser IT-enabled governance indang sessions ayongzüka liasü.

Probationers temi Agartala Land Port, Akhaura border, Dumboor Lake, aser Neermahal semdang aser Chief Secretary aser Tripura Civil Service Association den sensaksema liasü.

Kohima nung transformer raksar aliba melenogo

Kohima, Rongjui/Sept. 29 (TYO): Kohima yimtiba kübok Daklane Ward No. 7 nung aliba transformer ka September 24 ayatirm nung raksaba Power Department-i melena Deobar nikongdang tashinung power supply tanaben yanglutsüogo.

Tzüngsang-mopung aser

lenmang mejungi liaka Executive Engineer, Er. Shiludi Longkumer, SDO Er. Nuthozo Hoshi, JE Simon Belho aser par teloki anir Kohima Electrical Division ajanga Dimapur nungi 500 kV transformer ka bener atua inoka liasü.

Daklane Council aser yangji

aliba nüburtemi Department ketdangsür aser staff tem dang pelaba lemsatop aser parnok mapa ya tenüngsang agütsütsü langa lir ta ashi.

Council ajanga nüburtem dang lemsar yanglushiba mapang aremzüka atatsü ayongzüka, kechiaser transformer ya tendangba mapang lir.

3rd Digital Democracy Dialogue nung MP S. Phangnon Konyak aden



Goa nung 3rd Digital Democracy Dialogue alidang Member of Parliament (Rajya Sabha) S. Phangnon Konyak aden.

Dimapur, Rongjui/Sept. 29 (TYO): Nagaland nungi Parliament (Rajya Sabha) züngsem S. Phangnon Konyak-i 3rd Digital Democracy Dialogue nung shilem agia liasü, koba September 24-24, 2025 anogotem Panaji, Goa nung ali.

Iba sentong nung lai "Women-led Development, Women-led Society" omen nung

ajemdaker jembia liasü.

Sentong ya Rambhau Mhalgi Prabodhini ajanga Entertainment Society of Goa aser Government of Goa teyari nung ayongzüka liasü.

MP (Rajya Sabha) S. Phangnon Konyak-i linük yangerba nung tetsür temi anitsüba indang lemsatopa liasü, koba India Ato Kilonser

Narendra Modi-i Nari Shakti ajanga telemtetba balala agiba aser lokti melenshidaksüba nung tetsür nem tashi agüja lir.

Democracy tashi itshiba nung technology aser digital ajanga tongti shilem agiba indanga lai lemsatop aser item hadir ya kanga kumdanga amshira democracy aintsü ta lai ashi.

Rotary Club Kohima ajanga BE&L sentong ayongzüka

Kohima, Rongjui/Sept. 29 (TYO): Rotary Club Kohima ajanga September 29, 2025 nü Government High School PWD, Kohima nung Basic Education and Literacy Programme ayongzüka liasü. Iba sentong ya ajanga

Rotary-i shisaluyim aser yimya tajung temaba jenjangi ajungkettsü meranga inyakba tali jangjatsü. Iba sentong nung shilem ka ama Rotary Club ajanga school nem hand washing basins tenla agüja liasü.

DHS Peren ajanga SNSPA ayongzüka



Dimapur, Rongjui/Sept. 29 (TYO): District Health Society Peren ajanga September 29, 2025 nü Old Ngaulong aser Bamsiakelwa nung Swasth Nari Sashakt Parivar Abhiyan sentong ayongzüka agi.

Tetsür temang anema lidaksütsü, kibong anema alitsü aser nokdangtsü akokba tashidak indang awareness agütsütsü nükjiding nung iba sentong ya ayongzüka liasü.

Iba sentong nung health services aser mozü angati agütsü, kong shiranger 56 anepaluba den NCD 43, TB screening 50, HB test trok, Child immunization trok aser ANC ana liasü.

Nüburtemi temang anema alitsü asoshi yimya tajung amshitsü ajungmesoa nutrition, hygiene aser tetsür temang anepaluba indang awareness session ayongzüka aser IEC oset lema agütsü.

Akashvani Kohima ajanga sentong balala ayongzüka



Dimapur, Rongjui/Sept. 29 (TYO): India nung Radio Broadcasting küm 90 ajungba nungtem nung Akashvani Kohima ajanga September 26, 2025 nü Essay zülutepba, Health Camp aser Hindi ken tentepba tetoktepba ayongzüka liasü.

Iba benjongmung nung shilem ka ama Akashvani Kohima ajanga lanurtem tekolok mazüngi yutsütsü aser public service broadcasting jenjang ajungkettsü nükjiding nung September 26, 2025 nü PM Shri School Jawahar Navodaya Vidyalaya, Kohima nung Essay Writing Competition ayongzüka liasü.

Iba tetoktepba ya Class IX aser Class XII atema liasü, kong kaketshir 30 tashi tejangraba tulu nung arua shilem agia linük nung tesüba mapang, tang aser tarutsü nung radio dak sendakba shisatsü lemsatopa liasü.

Kasa anogo Akashvani Kohima nung "Swasth Nari Sashakt Parivar Abhiyan" (Healthy Woman, Empowered Family) kübok Health Camp ka Chief Medical Officer, Kohima

den lungjemer ayongzüka liasü. Iba camp nung Office of the Chief Medical Officer, Kohima district nungi ketdangsür 26 tashi arua Akashvani Kohima nung staff aser kinunger 59 tashi Anaemia, NCD, TB, HIV, Hepatitis B tendangba densema temang repranga liasü.

Maneni iba sentong nung shilem ka ama Akashvani Kohima Office nung Hindi Film Song Competition 2025 ayongzüka küm shia amungba Hindi Pakhwada celebration 2025 tembangba sentong ka ama liasü.

Iba tetoktepba nung Akashvani Kohima indang staff aser Town Official Language Implementation Committee (TOLIC) Nagaland nungi teshimtet nisungtem dena liasü.

Hindi ken tentepba nung tyakok angur nem kulizüng kaket den senpet agüja liasü. Iba tetoktepba nung 45 Assam Rifles nungi DG Long, Office of the Postal Services, Kohima nungi Prakash Sinha aser 105 Bn BSF nungi Dhanpal nungeri mezüngbuba, tanabuba aser tasembuba jenjang nguteta liasü.



September 29, 2025 nü New Delhi nung osangbenertem senden ka nung Kargil Democratic Alliance (KDA) lenir, Sajjad Kargili-i (tiyong) jembidang tangokba noksa nung angur.

India nung cancer agi shiranger shilem 26 agi teimba kümogo

New Delhi, Rongjui/ September 29 (Agencies): India nung cancer tashidak agi shirangertem teimba-teimba dang küma shilem 26 tali tuogo; 1990 küm India nung nütüing lakh 1 shia nungi nisung 84.8 bo cancer agi shiranga liasü, ajisiüaka 2023 küm tashi nungbo nütüing lakh 1 shia nungi cancer agi shiranger 107.2 liasü, ta study ka ajanga metetdaksü. 1990 küm nungi 2023 küm tsüingda cancer tashidak agi asürtem-a shilem 21 agi teimba aküm, ta kasa osang ajanga metetdaksü. Küm 33 tsüingda (1990-2023) India nung cancer tashidak agi shirangertem aser iba tashidak agi asürtemji US aser China na den medemdangra, linük ana nungjibo cancer agi shirangertem mesüra iba tashidak agi asürtem kanga ajema kümogo. US aser China na nung cancer agi shirangertem aser iba tashidak agi asürtem kanga ajema akümbaji moko sashia nokdangba, nisung ajak nem vaccine agidaksüba aser tashidak tendangdaksüba kulitem ajanga lir, ta AIIMS Delhi nung radiation-oncologist, Dr Abhishek Shankar-i metetdaksü. Paisa, India nungbo moko kanga chitepba, temang tali yiradaksüba aser infections den külemi kera tashidak meputetba kulitem ajanga cancer agi shirangertem aser iba tashidak agi asürtem teimba-teimba dang akümer, ta metetdaksü. Iba dak alia HPV aser Hepatitis-B vaccination, mammography, tepokpok cancer screening, colonoscopy

screening magiba den külemi mapang shidak nung treatment magiba kulitem ajanga iba tashidak agi shirangertem teimba dang akümer, ta pai metetdaksü. "India nung iba tashidak nokdangtsü atema asenoki tashidak nungi jenbua alitsü atema asalentongtem tajungba benoktsüla, screening programmes teimba akatsüla aser cancer care ya Universal health coverage nung züngoktsüla," ta Dr. Shankar-i ashi. Iba study team nung tongti, Institute for Health Metrics & Evaluation (IHME), University of Washington nungi Dr. Lisa Force-i, "Alima nung tashidak khuret tongtibaji cancer lir aser onoki bushitetba ajanga taruba kümtem nung ano tamajungba dang akümtsü," ta metetdaksü. "Iba tashidak anema inyaksü nüngdak aser cancer aziükba mapatongtem benoktsü nüngdak, ta angateta dang liaka alima nung iba ya tongtibang mekümdaksür aser iba tayongzükba koktettsü atema senotsü peria melemzüksür," ta lai ashi. 1990 küm nungi 2023 küm tashi nung China nungbo cancer agi shiranger shilem 19 ajema kümogo aser US nunga shilem 20 ajema kümogo; China nung iba tashidak agi shiranga asür shilem 43 ajema kümogo aser US nunga shilem 33 ajema kümogo. Iba study ajanga asadangtetba agi, 2023 küm alima nung cancer agi shiranger million 10.4 asü aser iba nungjagi asürtem shilem 42 (million 4.3) bo moko achiba densema taküm libaliro yimya

balala 44 ajanga liasü. 2023 küm India nung Parliamentary committee report ka ajanga India nung moko achiba aziüktsü atema moko chiyungtsütem nung saru aika atutsü benoka liasü. Committee report ajanga, "Committee-i ministry (health) dang Revenue Department den jembitepa tekaraba nung moko agi yangluba chiyungtsütem nung saru aika atutsü tebilemba benoker," ta metetdakja liasü. Parliamentary Committee-isa, Population-Based Cancer Registry aser Ayushman Bharat Digital Mission na ya sendakteptsüla; ibaji ajanga cancer agi shirangertem osang tejangja bendentettsü, ta metetdakja liasü. Ayushman Bharat Digital Mission ya Centre sorkari health sector atema benokba tongti mission ka lir. Iba mapatong kübok India nung ang ajak nem digital health IDs agütsüba ajanga hospital tem aser insurance firms-i nüngdakba mapang ajak nung sensotem indang health records melamela angur. India nung cancer agi shirangertem dak kanga menor ang tashidak (tatembangbuba stage) putetba ajanga tanneptsü mangur. Parliamentary committee jagisa, mapang shidak nung cancer tendangtsü atema 'Jan Aandolan Pace' kübok mapang shidak nung screening asütsüla, ta metetdaksü. "Tanur asoba aser tanur health atema inyakba mapatong ama ita nung khen cancer tendangtsü atema-a anogo ka shimtsüla," ta parliamentary committee-i benoka liasü.



Leh, September 29, 2025: Tawa Leh nung longkak aita police den raradang asüsang, Tsewang Tharchin asüpila sentong agitsü atema tasü mang bener aodang tangokba noksa nung angur. Tharchin ya taoba mapang Kargil rara nung shilem agir sepai ka liasü.

Tensa mesüngjem tashibo ken o mejembitsü: Leh Apex Body

Leh/New Delhi, September 29 (Agencies): Hombarnü September 24 nü Leh nung Leh Apex Body-i sangdong ka lanurtemi Ladakh atema state ajanga, Ladakh nung tensa jenjang akhangba den külemi mesüngjem tashibo onoki linük temzüng kübok Sixth Home Ministry indang High Schedule nung züngoktsü Powered Committee den ken atema takhangba agüja o mejembitsü, ta metetdaksü. Leh nung osangbenertem longkak aitdang police den senden ka nung jembidang Leh raratepba den külemi kiojen Apex Body nung Chairman, rondokja liasü. Iba tatalokba nungji nisung pezü asü aser Thupstan Chhewang-i, "Onoki nisung 80 dak tali yirua liasü. tang Ladakh tensa jungjunga Iba tatalokba sülen anogo asadangogo, aser Ladakh nung ka lir police-i activist tensa süngjema yimjung mali Wangchuk puogo. tashibo ken o jembiba nung Ladakh atema state jenjang onoki shilem magitsü akhangba dak sendakba nung bangjemogo," ta metetdaksü. Leh Apex Body aser Centre Paisa, "Onoki Home sorkar na ita pezü jungnüa ken Ministry, Union Territory o mejembii aruba sülen administration aser September 20 nü Centre administration dang tetsübu, sorkari ken o jembitsü atema mangyim aser tejashi tensa LAB aser Kargil Democratic agientsü atema telemtetba Alliance (KDA) na jaoka agia inyakang, ta mepishitsü," liasü.



September 29, 2025 nü Patna nung Jan Suraj Party tongti, Prashant Kishor-i osangbenertem den jembidang tangokba noksa nung angur.

BJP lenir, Printu Mahadevan-i Rahul Gandhi tepsettsü amokmeren

New Delhi, Rongjui/ September 29 (Agencies): BJP lenir, Printu Mahadevan-i mezüngmeshiba) aser Arrla 351(2) (ozüng alema amokmerenba) tetshia lir. Lok Sabha nung opposition lenir, Hombarnü Congress party nungi züngsemtemi Mahadevan amokmerenba sülen Hombarnü anema longkak ait aser Kerala nung BJP-ia telangzüba agüja liasü. amokmerenba sülen Hombarnü anema FIR ka benokogo. Kerala Pradesh Congress Amongnüa AICC general Committee (KPCC) secretary, secretary K C Venugopal-i shidi Sreekumar C. C-i ken o ka ajanga Union Home Minister agütsüba nung ajemdaker Amit Shah dang, "Iba Peramangalam police-i Printu amokmeren ya tilateri lenir kati Mahadevan anema FIR benok. o mekümdangi jembiba dangbo September 26 nü Malayalam masü. Tekeraba nung pa anema television sentong ka nung meinyakra Oppositon Lenir entepba mapang nung taoba anema inyaksü temelaba mapang ABVP lenir, agütsüba ama züngshitsü aser Mahadevan-i, India nungertemi nai Union Home Minister Ato kilonser Narendra Modi tenangzükba agiba anema pusemer, anungji India nungbo asütsü," ta metetdaksü. Nepal aser Bangladesh nung Venugopal-i, ruling party indang official otongdar kati longkak aitba ama maittsü, ta ashi. Rahul Gandhi lendongi yoktsüsa jembiego aser temzüng anema Paisa, Rahul Gandhi-i iba inyakogo, ta ashi. amaji tejangraba lira injang agi pa teku ateta aitsü, ta jembia liasü. Venugopal-isa, Rahul Gandhi Mahadevan anema benokba tepsettsü aiben amokmerener aser pa anema inyaksü FIR nungji Bharatiya Nyaya ayongzüker; item osangtemji Sanhita kübok Arrla 192 (rara BJP-i pusemba mesüra parnok adokdaksütsü ajungshiba), den tesendaktep aliba social Arrla 353 (yimjung raksatsütsü media platforms ajanga nükjidong nung sangdonger, ta metetdaksü.



TIR YIMYIM YIMOBILEM (EDITRIAL)

DIMAPUR TUESDAY, SEPTEMBER (RONGJUI) 30, 2025

Aener dang kechi sayutsü ?

Akhi mapangbo aener arubaji sentsü dang tsülok saka tanü asüngbo aener aruba agiang parnok nungi aener anir senzürtem nungi tenzüker parnok anendaktsür aser chiyongdaktsürtem ajak senotsü nung tajangzük angur. Atangji, akhi mapangbo yimten aser arogo ener kar jajaba dak alaka tanü ama alima repranga jajar raliwalir mesüra shishilembar aenertem mali asü. Ajisüaka, tanübo alima tesem aika nung aener arudaktsütsü asoshi alima topur junga yanglur aser parnok melamelaa arur otettsü atema tayimtsü lenmang tajungba lapoktsür aser gari lenmang dena kanga topur junga yanglur. Item tajangzüktemji asenoki meteta lir, iba jagi asen lima nunga raliwalirtem alima tesem balala nungi arutsü asoshi state government-ia kanga meranga inyakba angur. Ajisüaka, küm nung khien Kisama nung Hornbill benjong amongba mapang, yangji yartsüngsang repranga Naga nunger chiyongtsü kar chidanga anogo anasemka amongtsüba dak alaka asen lima nung tesayutsü aser tereprangtsü kecha maka. Atangji, Kohima anasa yimtsüng kar nungbo akhi mapang long agi yangluba nüngshi mapa karbo alitsü, iba dakji alaka asenoki aenertem reprangnüttsüsa kecha yangluteta maka. Meghalaya nung tangarbo longpang-longren, ayong aser arem lenmang ajak jungjunga mesemteter tenüng tapet tajung ka jaloktsür aser iba otsüji angashia tangaria reprangnüttsüsa yanglur. Kasaji, raliwalirtem adenshidak Israel lima nung asenoki tesem aika nung, talisa, Yisu alima nung aliba mapang sayatenya atalokba tesemtem kanga junga wazüka ayuba angutsü. Ashiko, tatalokbaji shitak süaka tesemjibo shitak masütsüa akok, saka parnok tesemji otsü den peta kanga mesüka mesemtetba agi alima tesem aika nungi oa repranger aser temoatsü angur. Kasaji, asenokia asen lima aser asen yimtak yanglutet. Asen lima nunga akhi putu nung atalokba otsü aika lir, itemji asenok tar nunger otsü mesüra asen lima süng long lanu mapang atalokbatem lir. Item otsü shiaji arem, ayong, tenem aser tesem kaka lir. Aji oda, tangar Khasi aser Israel nunger amaji asenoki otsü atalokdak tesemji mesemteta tereprangnüttsüka aser temetnüttsüka yanglutsüla. Tangar bendang lima nungi medemer aener asen limai aru nung, hau, Kohima nungbo tangari yanglua toktsüba World War II Cemetery-bo lir aser Nagaland government-ia akhidang yangluba museum ka lir. Itemji repranga senzüdang anogo kabo agitsü, ajisüaka Dimapur nung hopta junga amongtsü arur medemer aenertem dang kechi sayutsü ? Akhidang Kachari chuba chess asayaba tesem tilaka wazüka yur lir, ibaji sayurbo lenmang majungba, yimti yimdong memerükba aser light yindong aser telephone aser tzü pipe agi azüklen tokolak menütsüsa mesangshia aliba sayutsüba dang asütsü. Atangji, Dimapur nungi Longwai ao nungbo yangji angh aliba ki tiyong ajanga India aser Myanmar na artsü ladangba angutsü, idak nung jagi raliwalirtemji asen Ao limai arunungbo kechi sayutsü ta asenoki bilem tenzükti. Asenoki raliwalirtembo arudaktsüner saka parnok mapang endoka alima repranga jajatsüsa tereprangnüttsü aser temongnüttsü tesem kecha maka, anungji marur. Iba jagi asenoki memeteti asenok kanga akoksadagi. Joko, asenoki tsük lu mayimer aser tanga teka mapa nunga tejok majet, anungji asenoki inyaktettsüba kaji asen alidak Dimapur, Chumoukedima aser Niuland nunga sang mesüra asen Mokochung district nunga sang tangari reprangnüttsüsa aser tangar arua mongnüttsüsa asenoki asen otsü tajung agi alima tesem tajung ka kuma mesemtettsüla aser ayong aser arem meraksadaktsüi itemji raliwalir amongdak tesemtem kümdaktsütsüla. Iba nüngdak ya bilemdang, putu tasen nung Ao kin asoshi takok kaji Tzürangkong kümtetba aser Dimapur nung Aoyimkü, Aoyimti, Indisen kümtetba aser Chumoukedima nung Aoyim aser Tirym kümtetbatem asütsü. Item yimtsüngtem nungjia asen lipok otsü tajung agi raliwalirtem arua amongdak kümdaktsütsüsa asenoki otsü den apet tesem karbo mesemteta alima nem metetdaktsütsüla. Iba jagi asen arulen jangnep jangjatsü aser memetetika tangar alima kintem dena kinunger adianu kuma sendakteper alitsü.

OLEMSABANG TAMANG

~ N. Imtatsüng Imchen, Associate, Pastor DABA

(Iba ya DABA Tongtepratep Adok 156, January - July 2024 nung adokba ocet tazüngertem ajangzükdaktsütsü bilema adoktsür).

1936 küm Winona Lake, Indiana, USA, nung Horace Burr shiba nükpoker liasü pai pa medemer ken mejemer nüngtuko Virgil P. Brock dang yamai ashi "Anü aiba mapang oagi talang nung nüngjang merema akümbaji kanga dang temenungratsü ka, aser ni alishi taküm nung ibaji tenük agi kodanga mongudang, saka iba tobur tajungji tangar tenük ka ajanga ni jangja jangjaa nenok ajak den tejangjaba angur ta shia liasü." Iba O angashia Brocki "Anü Ir Oagi" ta asüba tanelar ken ya mejem ta otsü jagi ashir. Tsüngrem dak tamang shidak yutetetba ajanga alima timtem tekangshi jenti liaka item ajakji kokteta temeshi yimti - kotak nüklaji jangja jangjaa kümdaktsür aser tamang ulushidaktsür.

Tenük agi mongui kümer küm metsür pongu (25) renteter nisung ka liasü. Kenü anogo pa den tatalokba otsütem jembia-a sensakasem, joko sensaksem temer senshitsü mapang pa dang tasüngdangba ka asüngdang; Na küm 25 tashi tenük agi kecha mongui alidang teyanglur Tsüngrem dang komasa sarasademer aser na tangatetba kechi? Idangji pai menürem jaksü tener lemlalemla kü tsütsü meyiper ajemalua yamai ashi "Kü tenük agi kecha monguaka kü taküm tang tashi akum lir rongnung Yisu taochi agi toktsüba asoshi temulungjang ajak agi pelaseter ta ashi aser John Henry Yates-i (1891) mejemba ken "Tamangi Akoker" ta asüba ken to tena sayu; item tesüngmangtsü ken o angashidang kü mulungjang mesüngjemtetdi kümdaktsü aser temulungjang nung nülak agi atsünger (setdoktsür) amai aküm 'tamangtulu yamai noh' ta süngmangseta-a liasü.

Tamangtir

Iba akümüli nung mapang tatsü ka alidang (küm noklang majung ka), alima nung meimchir lendong timtem jenti agi sünga lir, aseni aginüaka maginüka aru-lang-lang, aser iba dak alaka meimchir arishi anogo kwika lir itemji shiangaia meshisadangteter aser khenyongi memetet, ibayongji Tenüngsang Kenzüleri 39:5, nung ashiba ama "Oh Kibuba nai kü anogotem aka piga dang yanglu, kü arishi ajonga ne madang kecha nunga. Oda alima nung alir meimchir ajak tangula dang lir." Iba lima arishi anogo kanga tatsü lendong timtem jentisa jenti agi meketbanga lir, saka anogoshi Kibuba den chichiba tangatetba tamang yur jajar asü masü ibaji dang tongtipang. Koba tia nung lidir liaka Tsüngrem dak tamang akanga ameta alitsü. "Nenok tamang nung ali asü mali, nenok sasa tendangang mesüra Yisu Khrista nenok dak lir ta, nenoki nenok sasa memetet no? Aji mesüra nenok atangji memetetba pur lir" 2 Cor.13:5.

Mangatetba purtem ama masü, saka tangatetba tajung tejangja bener tamang tongpang nung atentsü. Tamang tongpang raratsü asoshi kecha alima qualification balaka menüngdaker, Mathi15: 21-28, nung Kanantsür ka tamang ama to 'Kibuba ni yariang' ta pei tamang agi kechi tia nung lider-liaka asen tamang agi temulungtetba tulu nung teyanglur Tsüngrem dang ayimtendi. 1 Timothy 6:12, "Tamang tongpang tajung rara-ang teti tatem makaba taküm, koba asoshi na aja, aser kuli jenti madang kuli o tajung nangzükba item taküm ametang." Tamang tali züindaktsütsü mapang tajung kechiba tamang nung lulatsü, tebu Tsüngrem techir Yisu Khrista aser Tanela Temeshi dak amanga kümzüktsü tasü-tait tanela pei taküm nung amenlokdi.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Michigan nung aliba Tenla ki ka amakdang nisung 4 khaset



September 28, 2025 nü Grand Blanc Township, Michigan nung prangpong amer kati Jesus Christ of Latter-day Saints Tenla ki amakba sülen Tenla ki arungdang tangokba noksa nung angur. Telung noksa nung Tenla ki amaksang, Thomas Jacob Sanford angur.

September 29, 2025: Amongnü (September 28) Grand Blanc Township, Michigan nung prangpong amer nisung kati gari agi Tenla ki ka tsükboka atuba sülen nisung pezü khaset aser nisung aika yiruja liasü.

Tenla ki amaksangji arrshi küm 40, Thomas Jacob Sanford liasü ta jangjaogo.

Amongnü Church of Jesus Christ of Latter-day Saints Tenla kidang Khristantem tekülem sentong tagidak mapang nung anepdang 10:30 ako meta prangpong amer kati tamangertem dakji injang khaloktsüdang nisung ana khaset aser nisung 8 yiruja liasü.

Amongnü nikongdang osangbenertem senden ka ayongzüka jembidang Police Chief William Renye-i, Burton, Michigan nungi arrshi küm 40, Sanford ji police-i khasetogo, ta metetdaksü.

"Iba nisungba jagi gari amshia Mormon Tenla ki tsükpoka atuba sülen züngsemtem dak injang khaloktsü. Mpang tatsüka tsüngda sepaitemi iba tesem nungjisa melung melemi alisangji khaset," ta Renye-i metetdaksü.

Prangpong bena alisang jagisa Tenla kidangjia mi senokja liasü.

Bushisüngdanertemi ashiba agi, totzü amshiba ajanga Tenla kidangji mi adok aser kasa tesem nungji bomb-a asem angu.

Renye-i, "Asüngdangyatsü, digital kuli bushitsü aser Tenla ki amaksang indang osang tejangja metettsü atema FBI-i agent 100 nem mapa lempzüksüogo," ta metetdaksü.

Osangbenertem den jembidang Grand Blanc Township Supervisor, Scott Bennett-i, "Iba ama ozüing alema inyakba ya ozü nüburtem dak matalokdang, ajisüaka tang iba tatalokba ajanga onok melung raksar. Onoki akokba tashi takoksa anguba kibongtem yaritsü," ta ashi.

Truth Social ajanga US Tir, Donald Trump-i, "Grand Blanc,

Michigan nung prangpong amshia Church of Jesus Christ of Latter-day Saints amakba osang kü nem metetdaksüogo. Iba lendong atalokli iba tesem jagi FBI oa liasü aser parnok leniba nung bushisüngdangtsü," ta metetdaksü.

Trump-isa, "Melung melemi alisangji süadokogo saka tangazüksü aika lir. Iba ya maneni United States nung Khristantem amakba lir. Trump Administration-i nüburtem nem osang tejangja metetdaksütsü. Takoksa angurtem aser parnok kibongtem atema sarasademjang. Asen linük nung nisung tepsetba wara ya anentsüla, tangsa anentsüla," ta metetdaksü.

Iba tatalokba bushisüngdangertemi melung melemi alisang indang osettem

aser cell-phone records repranga bushisüngdang tenzükogo.

Church of Jesus Christ of Latter-day Saints-ia sangdong ka ajanga, prangpong amer kati tekülem sentong tagidak mapang nung amakdang nisung aika yiru, ta metetdakja liasü.

H o m b a r n ü - a osangbenertem den jembidang Police Chief Renye-i, Tenla kidang injang agi nisung ana asü aser tesülen Tenla kidang ano tasü mang ana nguogo, ta metetdaksü.

Tenla ki amaksang Sanford ya 2004 küm graduate asü aser 2004 küm nungi 2008 küm tashi sepai liasü; 2007 küm nungi 2008 küm nungbo pa Iraq-ia yoka liasü.

2016 küm pa kibong aküm aser arrshi küm 10 jabaso ka lir.

Charlie Kirk khasetba sülen lanur aika Tenla kidangi arur: De Gance



September 29, 2025: Tawa US nung conservative lenir aser Turning Point USA tentetsang, Charlie Kirk khasetba sülen lanurtem aikati Tenla kidangi aoer, ta Evangelical pastor tem aikati metetdaksüogo.

Communio tentetsang aser Tir, JP De Gance-i, Kirk-i jembiba otem ajanga Khristan yimsü indang angazüksü atema lanurtem aika ajungmesoa liasü, ta metetdaksü.

Osangbener den jembidang De Gance-i, "Pennsylvania, Ohio, Michigan, Illinois aser Douglas County, Colorado nung aliba Arogotem aikati tesüiba Amongnü ana tekülem sentong nung lanurtem aika adenba osang metetdaksüogo," ta ashi.

"Michigan nung aliba Arogo ka nung tanurtem aika aniteta liasü, ajisüaka parnok tain akümdangbo Tenla kidangi mao,

saka tesüiba Amongnü ana nung item lanurtemji aika Tenla kidangi arua liasü," ta De Gance-i metetdaksü.

Communio yagi US tesem balala nung Arogo 400 shi nungita yarir. Anglican, non-denominational aser Catholic Arogotema aikati tesüiba hopta ana tsüngda lanurtem aika tekülem sentong nung adentsü aruba osang Communio nem metetdaksü.

New York nung aliba V1 Arogo nung pastor, Mike Signorelli-ia, "Tawa ozü Arogo nung nisung 533-i Khrista agizükogo. Iba ya shisadangra tesüngmangtsüka lir. Linük nung lendong ka ajanga Tsüngremi aika melung nung jembia aikati tekümtet anguba shisadangdang ni tepela nung ajep," ta metetdakja liasü.

Signorelli-i, Charlie Kirk asüba ajanga aikati Khristan yimsü indang metettsü janrrar, ta ashi.

"Ibayongji pai (Kirk) college campuses-i oa tanela tongbang rara aser Khrista osangtajung lemsatepa liasü. Pai taküm bendanga agütsüba ya totzü nung mi tsükloksüba amai

ANOGO ABEN TSÜNGREM DEN

Tesülen tajungtiba
T.ken 132:1-10

Ne taküm nung tarongba tejangrabaji kechi? Ne kolok aser temulungjang sünga aliba pungmangji kechi? Dawid chuba pungmangji Kibuba külemdak ki ka yanglutsüba liasü. Iba ken nung Pai iba indang asenok dang ashir. Asenok rongnunga iba ama pungmang akar lidaktsünüali-teyanglur, teraksar masü.

Dawid taküm nung mapang talangba ka sepai ka liasü. Pai Israel nunger tsükchirtem nungi kümzük aser linük nung yimjung bener aru. Saka Pai rara nungi yanglutsüba dangi meyip. Pai noklangnok mertsüng den melentepnü. Pai ashi, "Tsüngrem alitsü asoshi ki ka ni mangu tashi ni aonunga memejangtsü".

Saka Tsüngremi Dawid tejangraba tulu aser temeshi madalokdaksü. Solomom, Pa jabasoiang tekülemdakji yanglu. Tamasabo Dawid mepelai liasü saka Pai ashi, "Ibai Tsüngremi mulungba süra ni agizüksü". Idangji kanga tesüngmangtsü mapa inyak: Pai tesülen putu yaria tekülemdak yanglu. Dawidi Sentongji agütsü aser hon,taripi,senti long aser merang sen million aika jenjang yutsü.

Asenok sendong aser tejangrabatem ajakbo asenok mapang nung mataloktsü akok, saka asenoki tanabuba tajungtibaji inyaktsü akok. Tsüngremiasenok alizüng matalokdaksüra, asenoki pa alizüng tongtettsü langa inyaktsü akok, Pa alizüng tongtettsü asoshi asenoki kar yaridi. Asenoki agütsüdi. Asenoki asen shisatsü agütsüdir, asenoki ajungshidi. Asenoki ajak inyaktsü makok, saka asenoki langkabo inyaktsü akok.

Ne pungmang Tsüngremi mulungba nung matalokra, ne sempet aser rongsen ajanga kar pungmang atalokdaksütsü kari yariang. Kodang nai tangar nungsang anguba dang nungi Tsüngrem sentsüwangshi asoshi tali bilemdir Tsüngremi na Pa sentong ataloktsü asoshi lemang timba nung amshitsü.

Tsüngremi anguba lemang tajungtiba nung Tsüngremi na amshidakjang.

liasü. Totzüji kechi? Totzüji Generation Z lanurtem lir. Iba nungji mi tsükloksüba ajanga asentenshi milak tulu janrrur," ta pai lemsatepa liasü.

Charlie Kirk ya arrshi küm 31 dang lia September 10 nü Utah Valley University nung sentong ka nung o tejembidak mapang nung lanur kati khaseta liasü.

De Gance-i, joko alima tesem balala nung lanurtem aikati Kirk ya shiba liasüar metetogo aser ano aikati pa ya shibaar metettsü janrrar, ta ashi.

Lanurtemisa Charlie Kirk-i kiyimba, kibong aser Khrista atema taküm aliba densema pa tangatetbatem metettsü janrrar, ta pai ashi.

"Kirk taküm otsü metetba ajanga lanur aikati pei taküm jenjang meyipa shisadangtsüsa akümtsü. Ibaji ajanga lanur aikati "Tang ni taküm aliba ya kechi atema? ta shisadangtsü," ta De Gance-i ashi.

US tesem balala nung lanurtem Tenla kidangi kanga jangrabangra aoba nungji ajemdaker De Gance-i Arogo nung lenirtem dang, tang mezüng Tenla kidangi arurtem

mesüra mapang talangka Tenla kidangi marui lir tang arurtem atema asalentong tajung yanglutsü aser Arogo nung shilem agidaktsütsü atema sentong tajung yanglutsü ajungshi.

"Arogotemi Khrista osangtajung lemsateptsüla; iba denji külemi Tsüngrem O angartem aser Tsüngrem o lemsateper na tsüngda tamang katettsüsa tesendaktep yanglutsü nüngdak," ta De Gance-i ashi.

Tang Tenla kidangi arur tasenpurtem atema asalentong junga yanglutsüla aser tekülem sentong dak alia saisapong densema parnoki shilem agitettsüsa tanga sentongtema ayongzüka katsütsüla, ta De Gance-i ashi.

"Saisapong mesüra tanga sentongtem ayongzüka katsüba ajanga züngsemtem tsüngda tesendaktep tajungba akümtsü. Iba mapang nungji pei taküm kuli-a lemsateptettsü. Iba ama mapang ka nungji nai tangar kar otsü metettsü, aser ibaji ajanga Arogoi züngsem ajak züngshia anepalur ta parnoki metettsü," ta De Gance-i ashi.

AO OSHI ANGAZÜKDAK:**TANÜ ANGAZÜKTSÜBA OJANG**

Tir Yimyim

Tiatep

(v) tia agi ajurutep (destined)

* Kinungtsü küna alitsü tiatep.

Tiatsü

(v) taküm nung tajung majung tensa ajuruba (fated)

* Tsüngremi kü nem mapa tajung aika tiatsü.

OLONG PAITEP # 7286

1			2		3		4		5
6		7							
					8				
9				10					
						11			
			12						13
	14							15	
					16				
			17						
								18	
19									

TIPLIN

2. Teburtemi tejak nung awaba

-(8)

6. T _ _ _ em

-(3)

8. Tzüik ayudak

-(3)

9. Nüngdakba dang timba

-(6)

11. Züina ao

-(4)

12. Yangi tzu angur

-(5)

14. Tangar dang nungi tali

-(4)

16. Senyong masü

-(6)

17. Oadokdi

-(3)

18. Tzü tarok

-(3)

19. Yimtaklir aikati iba ya ki den

külemi yanglusemer

-(8)

LANGTSÜNGLEN

1. Temejangdak

-(6)

3. Nisung ka mapa inyaksü nübo

-(4)

4. Azüntsü asoshi mejemba

-(6)

5. Tesangwa agütsüba

-(5)

7. Tila masü

-(4)

10. Tebenjem tetsür chanu

-(4)

11. Tekolak nung inok

-(4)

12. Tetsünga

-(6)

13. Tangar inyakba ka inyak

-(6)

14. Tim masü ta ashi

-(5)

15. Asalendong

-(4)

16. Tanüdagtsü

-(4)

OLONG PAITEP # 7285 TELANGZÜBA**TIPLIN :**

1. Telok, 4. Aluru, 6. Ozüing, 8. Emk,

9. Kin, 10. Teti, 12. Süir, 13. Jen,

14. Ola, 16. Talak, 17. Mazük.

LANGTSÜNGLEN :

1. Tenükjang, 2. Luden, 3. Kioktsü,

5. Lenti, 7. Tajangzük,

11. Teronem, 12. Sempa,

13. Jahaz.

NAI-A YA METETTER

New Haven, Connecticut nung "World's Largest Pizza Party" ayonga liogo. September 12, 2025 nü Taste of New Haven nungi Colin Caplan-i anir iba benjung ayonga amung aser Guinness World Records kuli angu.

10 buba annual Grand Prix cycling race aser A-1 Toyota Apizza Feast mapang New Haven-i ayongba Pizza Party nung nisung 4,525-i shilem agia liasü. Iba sentong nung City of Newark aser New Jersey Devils Youth Foundation-ia teyari agütsü.

Mohilary-i Zubeen Garg indang kürakyanglu aser park yanglutsü metetdaksü



Guwahati, September 29, 2025 (Agencies): Bodoland People's Front (BPF) tanishir aser taoba BTC Chief Hagrama Mohilary-i Deobarnü asür Zubeen Garg nem tetushi agütsüogo.

Asür Zubeen ya cultural icon ka liasü aser Assam otsü nung pa senmang teti alitsü ta Mohilary-i ashi.

"Zubeen Da tanüla asenok ajak dak lir. Shingaia pa mamadoktsü. Ozü BTR region nung pai shilem agiba atema tetushi agüja kürakyanglu ka yanglutsü aser park ka lapoktsü" ta pai ashi.

"Pai Assam nung shilem tajung agiba aser nübortem dak kongshiba o agi meshiteter saka pa asenok mulungjang nung teti alitsü" ta Mohilary-isa shisem.

Mohilary-isa BTC nung sorkar ketdangsübaren indang olen ka ashidang October 3 nü tezüngzüktep sentong agütsüba metetdaksü.

Iba sentong nung Governor adenshi jaokogo aser kasa anogo Assam Chief Minister Himanta Biswa Sarma den ajuruteptsü ta paisa ashi.

BTC nung alirtemi tenangzükbatem inyaksü aser terenlok alizüngtem atongtsü atema merangtsü. Ozü party-i BTR ajungtsü atema inyaksü ta Mohilary-isa ashi.



OFFICE OF THE

LIONS' CLUB LONGSA**TENÜNGSANG AGÜTSÜR**

Wb. Sangyumanenaser Wt. Temjenkala na jabaso **Sb. Chubatoshi-i** Research topic: formation and Spread of Ao Naga Ancestral Sites: Oral Traditional and Archaeology. Nagalang University nung Phd. Takok tulu anguba Asen LIONS' Club-i konang tetushi agütsür.

Asen Teyanglur Tsüngremi ne wadang tali moajangma ta asen Club sarasadem.

Sd/-
Temjenmeren
President

Sd/-
Toshi jamir
Secretary



Puja benjung ajanga BTC sorkar Oct 5 nungang akümtsü

Guwahati, September 29, 2025 (Agencies): Durga Puja benjung amungtsü aliba agi Bodoland Territorial Council (BTC) sorkar October 5 nung ang tezüngzüktep agia akümtsü.

Iba sentong ya jelia agütsüba liasü saka Assam Chief Minister Himanta Biswa Sarma aser Governor Shri Lakshman Prasad Acharya na jembitepba sülen anogo thinenogo.

October 3, 2025 nü Goddess Durga tzu nung ponga yoktsü aser sobaliba sentong o yimtenren sentong

metsükteptsü asoshi anogo thinen ta ketdangsürtemi ashi.

BTC lennir Hagrama Mohilary-i tawa tu Chief Minister Sarma den ajurutep aser council nung ketdangsübaren tayongzükbatem indang jembitepa liasü.

Mohilary den Durga Das Boro, Rihon Daimary aser Rabiram Narzary nung ama lennir tejentem dena liasü.

Bodoland nung development priorities, resource allocation, aser administrative efficiency atema parnoki olemtep.

Meghalaya-Assam arrtsülen police-i auer 4 khaset

Guwahati, September 29, 2025 (Agencies): Assam kübok Goalpara district nung Deobarnep auer pezü police den khatepdang khasetogo.

Deobarnep Ghiladubi area nung iba ya atalok. Auer pezüji Mukunda Rabha, Subur Ali, Zahidul Islam aser Chengbat Marak nung ta jangjaogo.

"Tesüiba anogo ishika onokn dangi iba tesem nung prangpong abener telok ka aliba osang angazüka liasü. Iba ya Meghalaya den arrtsü anasa lir. Onoki search operations inyaka aru" ta Goalpara Senior Superintendent of Police Nabaneet Mahanta-i ashi.

Iba telok yagi nisung pur aotsü mesüra ozüing alema mapa inyaksü merangtsü ta onoki osang angazük aser iba

jagi checkpoints balala lapoka amen ta pai ashi.

"Auertem ya gari ka nung aru aser Ghiladubi area nung checkpoints ka aliba ngur meyipa jena aotsü merang. Parnoki ozü telok dak injang khaloktsü aser iba jagi police-ia meyiper khatep" ta Mahanta-isa ashi.

Par pezüprong idangji yiru aser mozüki kati anir ao saka parnok ajak süadoker liasü ta SSP-isa metetdaksü.

Parnok ket nungi pistols 4, mobile phones 5, walkie-talkie sets 2 aser injangtem ngutetogo.

"Police-i ozüing alema inyaksangshiba noktangtsü renema lir. Onoki iba telok nung tanga züingsemtem lir mali bushitsü" ta SSP Mahanta-isa ashi.

Manipur nung WY tablets seret 67.26 den nisung 2 apu



Imphal, September 29, 2025 (Agencies): Narcotics Control Bureau (NCB) aser Assam Rifles külem telok kati World is yours (WY) tablets (Methamphetamine) seret 67.26 puogo.

Parnoki apuba drug indang jenjangji Rs 53.8 crore shi alang asütsü.

Osang tejangja ka angazükba

sülen September 26 nü Manipur kübok Chandel district nung Bala Point anasa mobile vehicle check post ka lapok. Iba district ya Myanmar den arrtsütepa lir.

Iba mapang Gypsy gari aser Kenbo motorcycle ka checkpoint leni aruba ngua sot aser idangji mozü shibelener ana apu.

Garitem mita reprangdang

WY tablets seret 67.26 bena aliba angu.

Tena den külemi drugs ji Narcotics Control Bureau ket nung agütsüogo ta defense wing-i sangdong ka nung ashi.

Iba mapa ajanga Assam Rifles aser NCB tsünga amalitepa drug trafficking anema tashi itaa raraba kuli agütsü ta parnokisa ashi.

GOVERNMENT OF NAGALAND

STATE COUNCIL OF EDUCATIONAL RESEARCH & TRAINING

NAGALAND : KOHIMA

NO.SCERT/NHS/TXB/01/2020/ /Dated: Kohima, the th September 2025

NOTIFICATION

This is for the general information of all concerned that SCERT, Nagaland in keeping with the Govt. notification No. DSE/ESTT/LANG/1-56/2015/368 dated the 24th April 2018, will facilitate the procurement of Nagaland Heritage Studies Textbooks Classes 1-8 and Nagaland Heritage Studies Textbooks (Alternative English) Classes 5-8 for all private schools for the Academic year 2026.

Henceforth, the Private Schools willing to use/introduce the Nagaland Heritage Studies (NHS) Textbooks should place their requirements through SCERT, the State's Academic Authority and not directly through the Publisher on the Google Form Link : <https://forms.gle/szi936wJ6wVjiVNt7>. The Advertisement will also be uploaded in the Department Website : <https://scert.nagaland.gov.in/>

Last date of submission of Order is on or before 31st October 2025.
For further queries kindly contact : 8014893515

(KEVIRALE-U KERHUO)
Director
SCERT, Nagaland, Kohima

North Korea aser China tesendaktep akangshitsü mulungtep

Beijing, Rongjui/Sept. 29 (Agencies): North Korea aser China foreign ministers ajanga linük ana tsüngta tesendaktep akangshitsü aser pei mulungba nung maparen balala inyakba mesüra linük balala anema tashiyim amshiba anema nokdaksü mulungtepogo, koba United States dak tenük yoker amai ajiteter.

North Korea lenir Kim Jong Un aser China Tir Xi Jinping küm trok dak tema lir mezüing senden mena kati ka yariteptsü aser amalitep akaba ulushitsü nangzükteper hopta asem shi lir Deobarnü Beijing nung linük ana indang foreign minister ajurutepa liasü. Aji masüdang Kim Aser Xi na Beijing military parade nung Russia Tir Vladimir

Putin densema linük balala lenirtem den külemi dena liasü, koba World War II tembangba temaitsü lir.

Kim, Xi aser Putin nunger külemi anguba ya United States anema lenmang asem lungjemba sayur amai lir, ajisüaka China-i US anema kobika aotsüar mejangja.

(Maneni tapak 8 nung...)

Ni linük yutsür jena maotsü, maneni nokdaksü: KP Sharma Oli

Gundu, Rongjui/Sept. 29 (Agencies): Nepal indang taoba ato kilonser aser CPN-UML mendenpuba KP Sharma Oli-i, pa linük yutsür jena aotsü sentong lir ta olulu jembiba aitsü aser tang aliba sorkari pa indang security aser ketdangsür maongka agientsütsü meranger ta ashi.

Gundu, Bhaktapur nung CPN-UML indang youth wing Yuwa Sangh Nepal sentong ka nung jembidang, pai linük nung alitsü aser yimten-yimsüsüba tsütsü maneni raratsü tebilemba lir ta ashi. "Iba tamendak dak makaba sorkari nem linük amoktsür asenok jena aotsü ama bilemer asü?" ta pai pa bhukumer tem dang asüngdang.

Linük nung yimjung, sorkar junga ketdangsüba aser constitutional order akhi ama bener arutsü temlungtetba lir, ta Oli-i ashi.

Gen-Z-i anir hopta aika

longkak aitba sülen September 9 nü taoba ato kilonser ya Baluwatar nung par ki yutsür ainshi aser par sorkar lao. Iba sülen pa Gundu nung para ki ka mesema alir, kechiaser Balkot nung par jurula ki nung longkak aiter temi mi senlochtsü.

Sushila Karki-i aniba administration ya chichiba masü aser ibai nüburtemi mulunga shimba masü saka tashiyim amshia ki o jen raksaja rongdoktsüba ajanga aruba lir, ta pai aitsü.

Oli-i sorkar dang longkak aitba mapang pai state ketdangsür den osang agitepba alinungbo temai adokjang ta ayongzüka, "Itemji tasü ita temai adokjang. Ni totuyuba agütsüba yimjak nung sangdongang," ta ashi.

"Social media nung ozü ki amaktsüba indang jembir. Sorkar kechi inyaker? Repranga atar?" ta pai asüngdang.

Typhoon Bualoi agi Vietnam kongshi; nisung 12 asü

Hanoi, Rongjui/September 29 (Agencies): Typhoon Bualoi agi Vietnam kongshiba sülen nisung 12 süogo aser nisung 17 samar bushidar. Yipru yagi ki aika raksatsü aser lenmangtem tzü agi metsüngdakja liasü, ta state media sangdong ajanga metetdaksü.

Hombar anepdang züngia lia yirpu ait tenzük, aser tzüyim nung tzüsem süklep 26 tashi adoka liasü, ta national weather agency-i metetdaksü.

Iba sülen yipru ya tashi meiti aküm aser tropical yipru ka kuma Laos leni ao, ta state media-isa metetdaksü.

Yipru yagi province balala nung khen atema yanglua aliba aputem apongtochtsü aser

lenmang o lenden nung aliba tesemtem metzünga liasü. Yimti nung tzümetzünga sülen gairtem metsüngbang aser tenem nung alirtem tesendaktep makai kümdaktsü, ta Associated Press news agency-i metetdaksü.

State media-i ashiba agi, teküzmükertemi angopur 17 tashi samar bushidar.

Mopung tesashi aonba sülen Hue yimti, Thanh Hoa aser Ninh Binh province nung ki aika chirepa liasü.

Quang Tri province nung mopung tesashi aonba ajanga angopudang amshiba rong ka alena aliba süngzü tokdangtsü aser iba ajanga rong nung mena alir parnok teku den rong aponger ao, saka nisung pezübo

KÜM 95 AJUNGBA TEPELA TASOBA ANOGO



MARMANGYANG (CHUCHUYIMLANG)

Temeim Obo,

Na tasoba anogo 30.9.1930 nungi tanü 30.09.2025 tashi arishi küm 95 renteta tia tensa tapu balala ajanga Tsüngrem taochi aser temoatsü nung len ania aruba asoshi Tsüngrem nem tenüngsang agüja tepela tasoba anogo, ner semchirtem ajaki nü den lemsateper. Obo! Na ama arishir aser onok asoshi shisa angodak longzük tajung ka onok nem moatsüba asoshi teyanglur Tsüngrem dang pelar. Maneni Tsüngremi ano nü nem arishi talang den anema aliba moajangma!

NÜ TEMEIM SEMCHIRTEM

OFFICE OF THE

DIMAPUR AOLI LONGCHAR KIDONG TELONGJEM

P.O. DIMAPUR - 797112 : NAGALAND

Dimapur Aoli Longchar Kidong Telongjem, taruba *Silver Jubilee* dak sendakba maparen asoshi **Lokti Senden** (Emergency General Meeting) **2nd October, 2025, 9:00 am** nungi senyur kidang ayonger.

Anungji, züngsem ajaki arua shilem tajung agitsü iba sangdong ajanga metetdaksür.

Sd/-
(TEMJENCHIBA LONGCHAR)
President, ALKT

Sd/-
(IMOTEMJEN LONGCHAR)
Secretary, ALKT

Iran-i Israel atema itdangiter ka tepsetogo

Tehran, Rongjui/September 29 (Agencies): Iran-i Israel atema itdangiter rongnung tongtibangtiba rongnung ka asütsü ta temulung melemi bilemba nisung ka aletseta südaktsüogo.

June ita Israel aser United States den anogo 12 raraba sülen Iran-i tang agi nisung 10 buba tepsetogo, ta Iran indang Mizan news agency-i metetdaksü.

Hombarnü Mizan news agency-i ashiba agi, Israel indang spy agency, Mossad ketdangsürtem den ajurutepba atema Bahman Choobiasl tepset.

Choobiasl ya telecommunications projects tongtibangtem nung inyaka liasü, ta kasa sangdong ajanga metetdaksü.

Defendant-i temepishiba benokba Iran indang Supreme Court-i magizük aser ali anema aibelenba asoshi pa tasüba agi merenshitsü obendang agüja liasü.

Israel atema itdangiter mapa inyakba asoshi aija Babak Shahbazi aletseta südaktsüba sülen iba ita tepsetertem rongnung Choobiasl ya tanabuba lir.

Ajisüaka activists temi ashiba agi, Shahbazi ya reshikangshia kuli teyazü agütsüdakja liasü. Kyiv nung raratsü atema Ukraine Tir Volodymyr Zelenskyy dangi shiti ka züluba sülen iba ya ataloka liasü.

Iran aser Israel na küm aika

anemtepa arudar aser taküm June ita rara adoka raratepogo aser iba amala tia tensa ka nung Iran-i Mossad den sendaktepa alir aser linük nung parnok inyaksangshi atema teyari agütsüba asoshi nisung aika tepsetogo. June ita raraba sülen Iran-i nisung 10 tashi tepsetogo.

Israel-i June ita anogo 12 tashi Iran nung general aser nuclear scientist tem aser iba den nisung aliba tesemtem den anüing ajanga amak. Iba atema telangzüba agüja Iran-ia missile aser drone noklang aika yoka liasü. US-ia Israel tenüing nung Iran indang nuclear site tem maka liasü. Amnesty International-i ashiba agi, Israel-i Iran amakba mapang nisung 1,100 asü.

June ita rara dak sendakba nung telangzüba agütsüba ama aser tawa linük rongsenketzüing jenjang mejungi akümba, tetesürtem temeden aser karibo yimsüsüba melenshitsü atema ayongzüka dak sendakba nung Iran-i nisung aika tasüba agi merenshitsü obendang agütsüogo.

Oslo nung amendaker aliba Iran Human Rights aser Washington, DC nung amendaker aliba Abdorrahman Boroumand Centre for Human Rights in Iran nati ashiba agi, Iran nung 2025 küm nisung 1,000 dak tema tepsetogo. Parnokisa asürtem ya timba asütsü akok kechiyong Iran-i parnoki tepsetertem ajak indangbo mesangdonger ta ashi.

NSF MM Trophy: JYO-i goal 4 agi PCC kokogo

Chumoukedima, Rongjui/September 29 (TYO): 25buba NSF Martyrs Memorial Trophy nung September 29 nü Chumoukedima Football Stadium nung asaya Jakham Youth Organisation-i goal 4-0 agi Patkai Christian College kokogo.

Asaya nung Mecievi Khieya-i Jakham Youth

Organisations atema minute 11, 48 aser 68buba nung goal asem idakja liasü. Maneni asaya nung Keduhoto Zao-i minute 41buba nung ano par team atema goal ka idaktsü.

Asaya atema Jakham Youth Organisations nungi Mecievi Khieya nem player of the match naroküm agüja liasü.

Naroküm ya PA to Advisor,

Urban Development & Municipal Affairs aser taoba mapang ASU Games & Sports Secretary Meguo Ratsa match patron liasü.

September 30 nü asaya:

Chumoukedima Football

Stadium

Kuki United FC (Manipur) vs

Damokles FC (Medziphema)

@5:00 PM.

Woakes international cricket asaya nungi anisüngzüker

Rongjui/September 29, 2025 (Agencies): England nunger all-rounder Chris Woakes, taküm Ashes squad nung mezüngoksemba sülen pa international cricket asaya nungi anenogo.

Arishi küm 36 tain asayar yagi linük tenüng nungi Test 62, one-day internationals 122 aser T20s 33 nung asayaogo.

Woakes ya 2019 küm 50-over World Cup aser 2022 küm T20 World Cup akokba team nung densema liasü.

Pa England team nungi mezüngbuba 2011 küm T20 asaya ka nung asaya aser mezüngbuba Test asaya 2013 küm Ashes series tatembangbuba asaya nung asaya liasü.

Woakes ya taküm lemluwa India den Test asaya 2-2 nung tembangba asayamung nunga asayaogo.

India den Test asaya pongububa nung mezüngbuba anogo pa tapu raksa, ajisüaka tatembangbuba anogo teka alepbanger teka külen agi dang

batting mena liasü.

Woakes-i Test asaya nung average 29.61 nung wicket 192 agi aser average 25.11 nung run 2,034 yanglua liasü.

ODI nung pai wicket 173 agi aser run 1,524 yangluogo. Paisa, T20 asaya nung wicket 31 agi aser run 147 yanglu.

"England tenüng nungi asayatsüji lanuwa nungi kü nükjidong liasü aser ni iba nükjidong tongtetba atema kanga pelar," ta pai social media nung zülutsü.

"Three Lions tola semer England tenüng nung asayaba aser küm 15 tsüngda team-mate tem den külemi asayaba, shirnok aika taküm tepeyong atema tembar kümogo, item ya lepa reprangshi dang nema danga bilemer.

"2011 küm Australia nung mezüngbuba asayaba ya yashi ama dang bilemer, saka na jangradema asayara idangji mapa aoba memeteter.

"World Cup ana akokba aser Ashes series tajung kar nung

asayaba ya takoktsü ta bilema maliasü aser item asayamungtem nung asayaba aser külem asayartem den benjungtepba ya ni teti bilemtettsü.

"Ni county cricket aser franchise cricket asayayonga aotsü yongya atar," ta Woakes-i ashi.

2023 küm Ashes nung kanga junga asayaba sülen Woakes nem Compton-Miller Medal agütsü, koba player of the series nem agütsür.

"Iba asaya asayartem rongnung Chris Woakes-a tajungtiba rongnung ka lir," ta England Men's Cricket managing director Rob Key-i ashi.

Kasa mapang nung ECB chair Richard Thompson-i, "taküm lemluwa Chris tapu alepbanger batting ameni adoka Test akoktsü merangba nguogo aser iba ajanga pai linük asoshi asayatsü koda jangrar aser team-mate tajung ka asütsü meranger aji sayur," ta ashi.

Suryakumar-i pa indang Asia Cup match fees tenla agütsütsü



Rongjui/September 29, 2025 (Agencies): India cricket team captain Suryakumar Yadav-i ashiba agi, pai Asia Cup indang match fee Indian armed forces aser Pahalgam nung kiralongrartemi tepsetertem nem tenla agütsütsü. Pa lenisüba nung India-i Deobarnü Asia Cup kokogo.

"Ni asayamung nung anguba match fee tem Indian armed forces aser Pahalgam nung kiralongrartemi tepsetertem nem tenla agütsütsü telemtetba agiogo," ta Yadav-i social media ajanga metetdaksü.

Yadav-i pa tamendakdak nungi masetshi-i Pakistan captain Salman Ali Agha den Deobarnü final nung densema asemben tashi mesalemi liasü. India aser Pakistan na

mezüngbuba group stage asaya tembangba sülen Yadav-i, "kiralongrartemi Pahalgam amakba mapang asür kinungertem den onok nokdaka lir ta ashitsü tang ya mapang tajung lir. Iba takok ya armed forces nem bendanga agütsür, shirnoki parnok tasü aitba sayuogo. Parnoki onok maneni ajungmesotsü imlar aser parnok meneremdaksütsü atema maongka anguba shia onoki meranga asayatsü tali ajungmesor," ta ashi.

Taküm küm tetenzüklen April ita kiralongrartemi Pahalgam amakba sülen Asia Cup nung India team Pakistan den mezüngbuba asaya liasü. Iba asayamung nung team ana asemben asaya aser asembenprongla India-i kokogo.

Final asaya akokba sülen India team-i Asia Cricket Council (ACC) tekolakba aser Pakistan Cricket Board (PCB) mendenbuba Mohsin Naqvi shiba linük Interior Minister lir, pa ket nungi takok marok agizüktsü memulungi liasü. Naqvi-i trophy ya bener oatok.

"Champion team nem takok marok magütsüba ni khen danga mongudangka. Takok marok angutsü onok langa lir. Shitakba takok marokji külem asayar 14 ya lir aser iba ya ni teti bilemtettsü," ta India captain Suryakumar Yadav-i asaya tembangba sülen osangbenertem den sensaksema mapang ashi.

Salman Ali Agha-i, Asia Cup nung India team yimyayimpong aitsüogo aser ashiba agi, iba yimya yagi osang tai agütsür.

"Suryakumar Yadav-i asayamung tenzükba mapang press conference aser referee senden nung kü den salemogo. Ajisüaka alima matsüngdangbo pai mesalem. Pa tetuyuba sülen anidaker asütsü," ta Agha-i Hombar anepdang post-match press conference nung ashi.

Mohun Bagan Super Giant pur Iran nung oa masayatsü

Rongjui/September 29, 2025 (Agencies): Indian Super League champions Mohun Bagan Super Giant-i sangdong ka ajang ashiba agi, parnok Sepahan SC den AFC Champions League 2 asaya atema Iran-i maotsü, koba Mongolbarnü asayatsü lir.

Bagan-isa, parnok tejangraba kümzüka ayutsü aser ajak agizüktsüsa ken o bentettsü atema Court of Arbitration for Sport (CAS) den tongteprateptsü telemtetba agiogo, ta ashi.

Tebilemtsüji club nung bendanger asayar trok-i Iran nung oa asayatsü atema memulunger, kechiyong parnok nem pei linüki Iran-i maotsü asoshi tetuyuba agütsüogo.

"Mohun Bagan Super Giant asoshi asayartem, ketdangsürtem aser support staff ajangzükdaksütsü aser parnok teküzmükba kübok toktsütsüji ajak dang tongtibangtiba lir. Onok asayartem aser parnok kinungertemi Iran-i aotsü tebilemtsü aliba indang lemsatepogo. Club-i parnoki mepeshiba kanga junga asadanger iba telemtetba agiogo," ta club sangdong ajanga metetdaksü.

"Sorkari tetuyuba agütsübatem kanga junga asayadangba sülen aser lendong ataloktsü akok ta bilemba aser asayartem tejangraba temulung dang yur

club-i CAS dang asayartem tejangraba kümzüka ayutsü aser ajak agizüktsüsa ken o bentettsü atema

tongtepratepogo," ta club sangdong ajangsa metetdaksü.

Taoba mapang MBSG-i, Asian Football Confederation (AFC) dang Sepahan SC den September 30 nü ACL 2 asaya asayatsü aliba ya tanga tesem kati belener aotsü mepeshia liasü.

MBSG nung Australia nunger attack nung asayar Dimitri Petratos, Jamie Maclaren aser Jason Cummings, UK nungi defender Tom Aldred nung densema lir. Tanga defender anaji Spain aser Brazil nungi Alberto Rodriguez aser Robson Robinho na lir.

MBSG pur ACL-2 nung mezüngbuba asaya Ahal FK den Salt Lake Stadium, Kolkata nung September 16 nü asaya saka makok.

Asaya nung shilem agitsü atema maoba ajanga ACL 2 nung India nunger club tem tarutsü mejungi akümtsü akok. Taoba season Mumbai City FC pur Tehran nung tongtibang bendanger asayartem medeni asaya. Mohun Bagan pur ano October 21 nü Jordan nung Al Hussain den asayatsü lir.

Taoba küm Mohun Bagan pur Tractor SC den asayatsü atema Iran-i maoba sülen AFC-i, ISL champion ya continent indang second tier club tetoktepba nung atsünginba ama agia liasü.

BENDANGLI OSANG : Tapak 7 nungi...

North Korea aser China tesendaktep...

China Foreign Minister Wang Yi den senden ka amenba mapang, Kim-i China den maneni tesendaktep akangshitsü ya North Korea indang anokshitsü makokba jenjang lir ta ashi, ta North Korean Foreign Minister Choe Son Hui-i ashi. Kim-Xi senden tanüla den lirumedema China den tesendaktep tarokba aser tajungba yangertsü tebilemba aliba Choe-i lemsatep, ta North Korea indang Korean Central News Agency ajanga Hombarnü ashi.

China-ia linük ana tsüngta tesendaktep akangshitsü tebilemba nung ajang-ajanga nokdaka lira ser tongtipang osangtsüsang aser shisa lemsatepba tashi itshitsü asoshi ibaji kanga nüngdak, ta Wang-i ashi.

China-i "hegemonism" yimya ajak anemer aser international aser regional affairs nung North Korea den amalitep akaba tashi itshitsü

renema lir, ta China foreign minister-i ashi.

Linük ana ya United States den yimya balala nung mangatettep adoka lir - külen China ya US den maparen balala nung tokteper aser North Korea ya nuclear weapons program mechi mangatettep nung lir.

Beijing military parade nung Kim adenba ya pai North Korea nung küm 14 yimsü süa arudang linük aika dena aliba sentong nung mezüng adenba alitsü.

North Korea ya Russia den amalitep ulushitsü dak rangloker Ukraine den raratsü asoshi sepai aser injang-bomb tema agütsür. Saka tang Kim-i China den tesendaktep tajungba akümtsü nüngdaker ama bilemer, ta mongin temi ashir. China ya North Korea asoshi külemi shishilempaba linük tulutiba aser teyaria yamaji agir. China-ia yamaji North Korea madak par tashi sayuner.

BILEMDANGANG

"Pei jangraba mapa nung belembabo mesasar."